

Krisis Aceh: Indonesia minta Dr. M guna pengaruh

UM 10 DEC 1999
JAKARTA 9 Dis. — Indonesia telah meminta Perdana Menteri Malaysia, Datuk Seri Dr. Mahathir Mohamad, menggunakan pengaruhnya untuk memulakan dialog dengan kumpulan aktivis prokemerdakaan dari wilayah Aceh yang tinggal di Malaysia.

Menteri Luar, Alwi Shihab, memberitahu para wartawan semasa pertemuan antara Presiden Abdurrahman Wahid dan Dr. Mahathir di Kuala Lumpur pada bulan lepas, Dr. Mahathir diminta menggunakan pengaruhnya untuk mengadakan dialog dengan rakan-rakan kami dari Aceh.

“Mahathir menyatakan beliau akan cuba memenuhi permintaan untuk mengadakan dialog, dan ini disusuli dengan Duta Malaysia, Datuk Zainal Abidin, menemui saya dan bertanya apakah langkah yang perlu diambil oleh Malaysia,” kata Alwi.

Pungutan suara

Didorong oleh pungutan suara anjuran PBB pada 30 Ogos di mana Timor Timur memilih untuk merdeka dari Indonesia, rata-rata rakyat Aceh menuntut pungutan suara yang serupa.

Alwi berkata, beliau memberitahu Duta Malaysia bahawa Jakarta mengalukan ‘sebarang tindakan yang dapat dilakukan’ bagi membantu mengekalkan keutuhan wilayah Indonesia.

Kumpulan berhaluan sederhana yang menyokong kemerdekaan Aceh tinggal di Malaysia.

Menteri Koordinasi Hal Ehwal Politik dan Keselamatan, Jeneral Wiranto, memberitahu para wartawan di Manila semalam bahawa Abdurrahman telah menawarkan untuk melakukan ‘tindakan pertama’ bagi memulakan rundingan dengan Gerakan Aceh Merdeka (GAM).
— AFP